

P R A E F A T I O.

tem recipias, ne anguem, ne leonem ad tuam, & tuorum perniciem in sinu fouendo, hospitalitatem in te, & in tuos crudelem & impiam exerceas. Cicero, libro 1. & 2. Officiorum hospitalitatem commendans, Valde inquit decorum, patere domus illustrium hominum, sed illustribus & bonis hospitibus, & illis, qui nihil de alieno inquirunt, & minimè in aliena Rep: solliciti sunt, & curiosi.

Tertia verò, & ea quidem præsentissima ac valde contagiosa Rerum pub. ac vrbium pestis est, non vna numinis, ac pietatis ratio; Religionis in vno Regno, intra vnius vrbis mœnia diuersitas, quæ, cum voluntatis, mentium, & animorum affectum in ciuium societate rumpat, hinc concordiam ciuilem turbat, dissociat, & dismembrat, vnde factiones, contraria plebis in vna vrbe studia, legitimi magistratus contemptus, odium, partesque diuersæ emergunt, quæ non tantum cum Magistratus sui Religione, sed cum alijs quoq; in eadem ciuitate factionibus, sibi, & Magistratu contrarijs, & æque nouis, nihil cupiunt habere commune. Quarum sermonibus, vsu, consuetudine, & contagio, incauta plebs decepta, ac in varias opiniones imprudenti zelo pertracta, non tantum Principis ac Magistratus sui, & conciuum Religionem, vt impiam & abominandam despicit, sed nouas, nouorum & diuersorum à se cœtuum ac Religionem, vt falsas, contemnit. Et ita, dum singuli, suam, vt iustam ac veram defendunt, tam infensis suarum partiũ studijs digladiantur, quod vnitatis & veræ pietatis spiritu se destitutos, eo ipso, demonstrant. Turca in eo, nobis Christianis prudentior, qui nullam de sua Religione disputationem publicè, vel priuatim admittit, Græcorum & Vngarorũ in Religione dissidijs edoctus, quantam calamitatem eius diuersitas Regnis & ciuitatibus adferat. Quod nostra etiam Germania infelix deplorat. & sentiet, suo tempore, eodem contagio infecta Gallia. Perniciosissimi certè Reipu. nostræ Christianæ Gigantes, qui mendacibus & falsis opinionibus vrbium animam, mentes videlicet ciuium oppugnando, inficiunt, à Magistratu separant, ac tandem eo impellunt, vt imperitum ac miserum vulgus, velut Cyclopes, mentis ac rationis oculo destitutus, arreptis armis, Potestatem, hoc est, Dei ordinationem, atque ita, Deum ipsum, quemadmodum Nemrodi Gigantes, oppugnet. Hinc seditionum formidabilis oritur belua, cuius pars vna deuorat alteram, donec florentes vrbes, Regna, & Imperia tandem corruant, ac funditus pereant. Quod multis Asiæ, Africæ, & Europæ ciuitatibus euenisse, Ex historiæ monumentis eruere placet. Vt discant vrbes, quæ nunc sunt potentes & amplæ, non in fortitudine sua, sed in Domino confidere, qui nisi eas custodierit, frustra omnes illorum conatus laborant, & frustra vigilant, qui eas custodiunt.

Vbi nunc EPHESVS, Asiæ totius Metropolis tam multis prophanarum & Ecclesiasticarum celebrata historijs? Vbi ANTI OCHIA nobilissima Syriæ vrbs, quæ Patriarcham, & sub illo decem & quatuor Metropolitanos habuit, D. Petrum Apostolum, Ignatium, Iohannem Chrysostomum, multosque alios, celeberrimi nominis Episcopos. Et in qua prima Christiani nominis appellatio est orta? HIEROSOLYMAE, Palestinæ Metropolis, quàm exiguæ nunc supersunt reliquiæ, quàm Deus politia legis veteris, & IESVS, saluator noster, doctrina, sua & Apostolorum præsentia beavit: quam Plinius nobilissimam totius Orientis urbem nuncupat. CARTHAGINIS ruinæ, stupenda est memoria, quæ vniuersam penè Africam, suo continebat imperio. Nunctantæ vrbs solum camposque tantum conspicimus, vbi illa fuit. Hæ autem vrbes hanc potissimum ob causam perierunt, quia ciues nouæ doctrinæ Pauli Samosatani, Nestorij, Arrij aurem præbentes, mutuis & domesticis dissidijs diuisi, in barbarorum potestatem peruenerunt, quorum nunc seruitute premuntur.

Quin etiam complures aliæ, non minus opulentæ, alijs ex causis, permittente Deo, funditus deletæ sunt & euerse. Hippacis Mafsiorum Regiæ vrbes SIGA & TAMAE, à Romanis dirutæ, vbi olim sitæ fuerint nunc, quasi ignoratur. Historiarum monumenta produnt, trecentas ciuitates à Tyrijs ædificatas, quas Oceanus Atlanticus alluebat, quarum nunc paucæ in insulis supersunt, Prouincia. Thesmenia enumerabat quadraginta duas vrbes, quas omnes Iosephus Marochi rex, solo æquauit. Cyrenesium Libiæ regio, ad solitudinem propè est redacta, & CYRENE ipsa, ingentium Regum sedes, nullibi apparet. In Aegypto desertæ sunt ille THEBÆ quibus centum portæ erant, ac singulis portis equites duceti ad custodiam. Ita, vt illam tuerentur equitum viginti millia ad ipsas portas oberrantium. Iacent TANANIS, HELIOPOLIS, VBASTVS, celeberrimæ Regum ciuitates. Ipsa denique ALEXANDRIA, nihil aliud nunc habet, nisi ruinas. MEROE Aethiopũ Regia nullibi apparet, quæ, vt Plinius scribit, dabat armatorum ducenta quinquaginta millia, artificum quadraginta millia alebat. BABILONIS, SELEUCIAE & NINI quarum incredibilem magnitudinẽ omnes prædicant, leuia tantum supersunt vestigia. TIRI, SIDONISQUE olim Res. pub. florentissimæ & potentissimæ, quæ Europam atque Africam Colonijs repleuerunt: modo